

嶺外代答二



嶺外代答
(二)



嶺外代答卷六

器用門

舟楫

端硯

余屢過端溪必登硯巖論之詳矣石品不一大槩有三曰巖石曰坑石曰黃步石巖上也坑次也黃步其下也凡此皆三品之佳者論之耳若其不佳等爲棄物不足論也黃步麌而有紋善耗墨亦善敗筆正可作良研非文房中所寶坑石有二南坑新坑南坑石眼奇暗新坑石眼中有朱點而亦暗然皆體硬叩之堅然雖細潤久則不宜於墨忽得一至潤良材乃復大奇雖巖硯無以遠過巖石有三上巖中巖下巖高在山之脣乳閉曰上巖深入人至與平地等曰中巖深入至水府曰下巖上巖石理燥渴中巖溫潤宜人歲久亦滑墨至於下巖則奇絕一世石理如玉望之似蘊德君子循之則溜滑滋潤欲識其真要不可言傳也若夫山心石根韜藏深潤其大如斗中有子石宜墨百年不枯蓋世之寶在是三巖者雖有三巖而中則相通其實以高下定石之等耳人之深人蛇自窻口疊木爲小級道委蛇曲折入於黃泉以數百人高下排比以大竹筒傳水以乾其洞然後續膏燭幽而施錦鑿其得之也可以爲難矣是宜寶之

筆

廣西多鵝羽毛甚澤人取其頸毛絲而聚之以爲筆全類兔毫一枝直四五錢然毫短鋒齊軟而無力

止宜細書。苟字大半寸，難書矣。嶺外亦有兔毫，其毫乃不堪爲筆。靜江府羊毫筆，則絕佳。蓋馳聲於深廣也。

墨

容州多大松，其人能製墨，佳者一笏不盈百錢。其下則一斤止直錢二百。商人舉數則搭賣之。交趾墨雖不甚佳，亦不至甚腐。交人以墨與角硯、鵝筆併垂腰間。

茶具

雷州鐵工甚巧，製茶礮湯甌湯置之屬皆若鑄就。余以比之建寧所出，不能相上下也。夫建寧名茶所出，俗亦雅尚，無不善分茶者。雷州方啜蓋茶，奚以茶器爲哉。

螺杯

南海出大螺，南人以爲酒杯。螺之類不一，有哆口而圓長者，曰螺盃。有闊而淺形如荷葉者，則曰澈灑盃。有剖半螺色紅潤者，曰紅螺盃。有形似鸚鵡之睡，朱喙綠首者，曰鸚鵡盃。

羽扇

靜江人善捕飛禽，即以其羽爲扇。凡扇必左羽，取羽張之，以線索繫住，俟肉乾筋定，乃可用。鶩大禽也，以其羽爲扇，長數尺，黑色多風。勇士用之，頗壯觀。鶩羽潔白，輕質而風細。士夫多用之，以膠漆塗其筋骨，而丹之，頗亦雅尚。交趾人又用鶩羽，以線編比羽管而別施柄。其說謂交趾地多蛇，鶩能食蛇，蛇聞鶩羽之氣，必遠避之。用鶩以卻蛇也。

蠻刀

猺人刀及黎刀、略相類，皆短刃而長靶。黎刀之刃尤短，以斑藤織花纏束其靶，以白角片尺許如鵝尾飾靶之首。猺刀雖無文飾，然亦鋒甚。左右江峒與界外諸蠻刀相類，刃長四尺而靶二尺，一鞘而中藏二刃。蓋一大一小焉。靶之端爲雙圓而相竚。峒刀以黑皮爲鞘，黑皮爲帶。蠻刀以褐皮爲鞘，金銀絲飾靶。朱皮爲帶。峒刀以凍州所作爲佳。蠻刀、以大理所出爲佳。猺刀、黎刀帶之於腰。峒刀、蠻刀佩之於脣。峒人、蠻人、寧以大刀贈人，其小刀必不與人。蓋其日用須臾不可闕，忽遇樂箭，急以刀剜去其肉，乃不死。以故不以與人。今世所謂吹毛透風，乃大理刀之類。蓋大理國有麗水，故能製良刀云。

蠻甲冑

諸蠻甲冑皆以皮爲之。猺人以熊皮爲甲冑，其士有木葉似漆，以之塗飾，亦復堅善。猺人之剽掠，介冑者止數人，以爲前行，其餘悉袒裼，亦足見其易與矣。而靜江鄉民未嘗有甲，所以望風而遁。其間一二圍聚有皮甲者，猺人亦且避之。自猺人而西南，如南丹州、邕州左右江峒溪，至於外夷，則甲冑盛矣。諸蠻唯大理甲冑以象皮爲之，黑漆堅厚，復閒以朱縷，如中州之犀毘。器皿又以小白貝綴其縫，此豈詩所謂貝冑朱綬者耶？大理國之製前後掩心，以大片象皮如龜殼，其披膊以中片皮相次爲之，其護項以全片皮捲圈成之。其他則小片如中國之馬甲，葉背堅與鐵等，而厚幾半寸。苟試之以弓矢，將不可徹。鐵甲殆不及也。

蠻鞍

蠻人馬鞍與中國鞍不相遠，但不用韁。唯有橋鎧貼腿耳。橋朱黑相漆，如犀昆紋。鎧如半襠，藏足其中。蓋猺人路險，馬行荆棘，懼傷足也。貼腿以皮包下，亦用氈以傅馬脊，後繖鐵木爲大錢數十枚，珠貝而繫之，如驛驥然。鞍皆大，宜於馬脊，但前橋差低耳。

蠻弩

凡蠻猺之弩，狀如中都之吃笪弩，蓋不能彌弓，而皆能踏弩也。以燕脂木爲之，長六尺餘，厚二寸，博四寸許，其長三尺餘，厚止半寸，不劃箭槽，編架其箭於括，故名曰編架弩。其箭刻竹爲之，或用小圓竹，而皆有弩之箭戶，鏽如蠻，或如鳧茨葉，以軟皮爲羽，利於射高，而不可以俯射，則弓易軟，矢易鉤，非良材也。宜州南丹等，及邕州左右江之諸峒，西南舊弩，其製作略同。其弓材，明良矣。唯南丹弩，弓材爲絕佳，蓋南丹弩弓，其材有五：加木、上也；石木、次也；黃速樞、又其次也；燕脂木、爲下矣；加木、射愈近而激矢愈遠，無末約之弊，故名曰加石木。虧理沈黑堅，類鐵石，黃速樞，發矢聲鏗然也。視燕脂木則力同，而矢遠倍之矣。余嘗聞吃笪小弩之利，材之良與夫，抹弦撥弦，撲矢，擗矢之技，頗臻乎巧。及聞靜江猺人弩勁甚，矢無空發。古縣之民一聞虛弦之聲，率皆奔潰，因見蠻弩即吃笪之大者耳。

融錫

梧州生錫最良，藤州有黃岡鐵，最易融。州人以梧鍛淋銅，以黃岡鐵夾鑄煅之，遂成松文，刷絲工飾其製。

劙亦頗鋟然終不可以爲良。

黎弓

諸猺皆以弩爲長技、唯南黎人以弓爲長技。黎弓以木、亦或以竹而弦之、以藤類中州彈弓、其矢之大其
鏃也、故雖無羽亦可施之於射近、大抵黎弓正與倭弓相類、但倭弓長大而黎弓短小耳。倭弓長丈許、據
弓下梢於地、平身射之、手空矢長能以無羽之矢命中於百步之外。黎人弓短矢重、往者黎人跳梁、官兵
以竹弓禦之、矢不能斃人、大爲黎人所輕、彼特未遇吾勁弓耳。然南方卑濕、角弓易壞、惟竹弓可用、不勁
也固宜。若蠻峒之速樞木加木石木、天下之良材也、誠得是木製以爲弓、雖角弓之勁、有不能當者、雖以
威天下可也。

藥箭

溪峒弩箭皆有藥、唯南丹爲最酷。南丹地產毒虺、其種不一人乃合集醞釀以成藥、以之傅矢、藏之竹筒。
矢鏃皆重縮、是矢也、度必中而後發、苟中血縷必死。唯其土人自有解藥、南丹之戰也、人以甘蔗一節自
隨、忽爾中矢、即噉蔗則毒氣爲之少緩、急歸繫身於木株而服解藥、少焉毒作、身將奮擲於木株、繫身得
不擲死、否則藥作而自躍於虛空、阻地撲殺耳。邕州溪峒以桄榔木爲箭鏃、桄榔遇血悉裂、故其矢亦能
害人。

梧州鐵器

梧州生鐵，在鎔則如流水，然以之鑄器，則薄幾類紙，無穿破。凡器既輕，且耐久。諸郡鐵工煅銅，得梧鐵雜淋之，則為至剛，信天下之美材也。

木蘭舟

浮南海而南，舟如巨室，帆若垂天之雲，施長數丈，一角數百人，中積一年糧，叢豕釀酒其中，置死生於度外，徑入阻碧，非復人世。人在其中，日擊牲醕飲，送為賓主，以忘其危。舟師以海上隱隱有山辨諸蕃國，皆在空端，若曰往某國順風，幾日望某山，舟當轉行某方，或遇急風，雖未足日已見某山，亦當改方。苟舟行太過，無方可返，飄至淺處，而遇暗石，則當瓦解矣。蓋其舟大載重，不憂巨浪而憂淺水也。又大食國更越西海，至木蘭皮國，則其舟又加大矣。一舟容千人，舟上有機杼市井，或不遇便風，則數年而後達，非甚巨舟，不可至也。今世所謂木蘭舟，未必不以至大言也。

藤舟

深廣沿海州軍難得鐵釘，桐油造船，皆空板穿藤，約束而成，於藤縫中，以海上所生茜草乾而塗之，遇水則漲，舟為之不漏矣。其舟甚大，越大海商販皆用之，而或謂要過礁石山而然，未之詳爾。今獨舟底以柘木為釘，蓋其江多石，不可用鐵釘，而亦謂蜀江有礁石山，得非傳聞之誤。

刳木舟

廣西江行小舟，皆刳木為之，有面闊六七尺者，雖全成無罅，免繩柳之勞，釘灰之費，然質厚遲鈍，遇大

風浪則不能翔，多至沈溺，要不若板船，雖善不能爲矣。欽州競渡，敵舟亦列全木爲之，則其地之所產可知矣。海外蕃船亦有刳木者，則其爲木何止合抱而已哉。

柂

欽州海山有奇材二種，一曰紫荆木，堅類鐵石，色比燕脂，易直合抱，以爲棟梁，可數百年。一曰烏楚木，用以爲大船之柂，極天下之妙也。蕃船大如廣廈，深涉南海，徑數萬里，千百人之命，直寄於一柂，他產之柂長不過三丈，以之持萬斛之舟，猶可勝其任。以之持數萬斛之蕃舶，卒遇大風於深海，未有不中折者。唯欽產繩理堅密，長幾五丈，雖有惡風怒濤，截然不動。如以一絲引千鈞於山巒震顫之地，真凌波之至寶也。此柂一雙，在欽直錢數百緡，至番禺溫陵，價十倍矣。然得至其地者，亦十之一二，以材長甚難海運故耳。

蠻笠

西南蠻笠，以竹爲身，而冒以魚氈，其頂尖圓，高起一尺餘，而四圍頗下垂，視他蕃笠，其製似不佳。然最宜乘馬，苦頂高，則定而不傾，四垂則風不能颺。他蕃笠所不及也。交趾有笠，如兜鍪而頂偏似田螺之脣，謂之螺笠，以細竹縷織成，雖曰工巧，特賤夫之所戴爾。

皮履

交趾人足躡皮履，正似今蠻羅漢所躡者，以皮爲底，而中施一小柱，長寸許，上有骨朵頭，以足將指夾之。

而行或以紅皮如十字倒置其三頭於皮底之上以足穿之而行皆燕居之所履也地近西方則其服飾已似之矣

服用門

綵

邕州左右江峒蠻有織白綵白質方紋廣幅大縷似中都之線羅而佳麗厚重誠南方之上服也

布

廣西觸處富有苧麻觸處善織布柳布象布商人貿遷而聞於四方者也靜江府古縣民間織布繫軸於腰而織之其欲伸幹則軸而行其必踴數不均且甚慢矣及貿以日用乃復甚佳視他布最耐久但其幅狹耳原其所以然蓋以稻穢心燒灰蒸布縷而以滑石粉膏之行梭滑而布以緊也

猺斑布

猺人以藍染布爲斑其法以木板二片鏤成網花用以夾布而鎔蠟灌於鏤中而後乃釋板取布投諸藍中布既受藍則煮布以去其蠟故能受成極細斑花炳然可觀故夫染斑之法莫猺人若也

水紝

廣西亦有桑蠶但不多耳得蠶不能爲絲煮之以灰水中引以成縷以之織紝其色雖暗而特宜於衣在高州所產爲佳

練子

邕州左右江溪峒地產苧麻潔白細薄而長土人擇其尤細長者爲練子暑衣之輕涼離汗者也漢高祖有天下令賈人無得衣練則其可貴自漢而然有花紋者爲花練一端長四丈餘而重止數十錢捲而入之小竹筒尙有餘地以染真紅尤易著色厥價不廉稍細者一端十餘緡也

安南綢

安南使者至欽太守用妓樂宴之亦有贈於諸妓人以綢一匹綢纖如細網而蒙之以綿交人所自著衣裳皆密綈也不知安南如綢之綢何所用也余聞蠻人得中國紅絰子皆拆取色絲而自以織衫此綢正宜折取其絲耳

氈

西南蠻地產綿羊固宜多氈毳自蠻王而下至小蠻無一不披氈者但蠻王中錦衫披氈小蠻袒裼披氈爾北氈厚而堅南氈之長至三丈餘其闊亦一丈六七尺摺其闊而夾縫之猶闊八九尺許以一長氈帶貫其摺處乃披氈而繫帶於腰婆娑然也晝則披夜則臥雨晴寒暑未始離身其上有核桃紋長大而輕者爲妙大理國所產也佳者緣以阜

吉貝

吉貝木如低小桑枝萼類芙蓉花之心葉皆細葺絮長半寸許宛如柳綿有黑子數十南人取其葺絮以

鐵筋礮去其子，卽以手握葺就紡，不煩緝繕，以之爲布，最爲堅善。唐史以爲古貝，又以爲草屬，顧古吉字訛。草木物異，不知別有草生之古貝，非木生之吉貝耶？將徹木似草字畫，以疑傳疑耶？雷化廉州及南海黎峒，富有以代絲綺。雷化廉州有織匹幅長闊而潔白細密者，名曰慢吉貝；狹幅蟲疎而色暗者，名曰蟲吉貝，有絕細而輕軟潔白，服之且耐久者。海南所織，則多品矣。幅極闊，不成端匹。聯二幅可爲臥單，名曰黎單。開以五采，異紋炳然，聯四幅可以爲幕者，名曰黎飾。五色鮮明，可以蓋文書几案者，名曰鞍搭。其長者，黎人用以繚腰。南詔所織尤精好，白色者，朝霞也。國王服白氍毹，王妻服朝霞。唐史所謂白氍毹吉貝，朝霞吉貝是也。

蟲絲

廣西楓葉初生，上多食葉之蟲，似蠶而赤黑色。四月五月，蟲腹明如蠶之熟，橫州人取之，以醯醋浸而擘取其絲，就韻中引之，蟲可得絲長六七尺，光明如煮成弓琴之弦，以之繫弓刀，執扇固且佳。

婆衫婆裙

欽州村落土人新婦之飾，以碎雜綵合成細毬，文如大方帕，名衫。左右兩個，縫成袖口，披著以爲上服。其長止及腰，婆娑然也。謂之婆衫。其裙四圍縫製，其長丈餘，穿之以足，而繫於腰間，以藤束腰，抽其裙令短，聚所抽於腰，則腰特大矣。謂之婆裙。頭頂藤笠，裝以百花鳳爲新婦服之一月，雖出入村落墟市，亦不釋之。

食用門

酒

廣右無酒禁。公私皆有美醞。以帥司瑞露爲冠。風味蘊藉似備道全美之君子。聲震湖廣。此酒本出賀州。今臨賀酒乃遠不逮。諸郡酒皆無足稱。昭州酒頗能醉人。聞其造酒時。採曼陀羅花。置之甕。而使酒收其毒氣。此何理耶。寶橫之間。有古辣城。山出藤藥。而水亦宜釀。故酒色微紅。雖以烈日中數日。其香味宛然。若醇厚則不足也。諸郡官民多釀老酒。可經十年。其色深沈赤黑。而味不壞。諸處道旁。率沽白酒。在靜江尤盛。行人以十四錢買一大白。及豆腐羹。謂之豆腐酒。靜江所以能造鋅粉者。以糟丘之富也。

茶

靜江府修仁縣產茶。土人製爲方錠。方二寸許而差厚。有供神仙三字者。上也。方五六寸而差薄者。次也。大而麤且薄者。下矣。修仁其名。乃甚彰。煮而飲之。其色慘黑。其味嚴重。能愈頭風。古縣亦產茶。味與修仁不殊。

食檳榔

自福建下四川。與廣東西路。皆食檳榔者。客至不設茶。唯以檳榔爲禮。其法斬而瓜分之。水調蜺灰一銖。許於蓼葉上裹檳榔咀嚼。先吐赤水一口。而後噉其餘汁。少焉面臉潮紅。故詩人有醉檳榔之句。無蜺灰處。只用石灰。無蓼葉處。只用蓼藤。廣州又加丁香。桂花。三顆子。諸香藥。謂之香藥檳榔。唯廣州爲甚。不以

貧富長幼男女自朝至暮寧不食飯唯嗜檳榔富者以銀爲盤置之貧者以錫爲之費則就盤更噉夜則置盤枕旁覺卽噉之中下細民一日費檳榔錢百餘有嘲廣人曰路上行人口似羊言以蠻葉縛咀終日嚙桐也曲盡噉檳榔之狀矣每逢人則黑齒朱唇數人聚會則朱殷偏地實可厭惡客次士夫常以盃白隨製如銀鋌中分爲三一以盛薑一盛蜆灰一則檳榔交趾使者亦食之詢之於人何爲酷嗜如此答曰辟癢下氣消食久頃刻不可無之無則口舌無味氣乃穢濁嘗與一醫論其故曰檳榔能降氣亦能耗氣肺爲氣府居膈上爲華蓋以掩腹中之穢久食檳榔則肺縮不能掩故穢氣升聞於輔頰之間常欲噉檳榔以降氣實無益於癢彼病癢紛然非不食檳榔也

老鮓

南人以魚爲鮓有十年不壞者其法以鹽及驥麪雜漬盛之以甕甕口周爲水池覆之以椀封之以水水耗則續如是故不透風鮓數年生白花似損壞者凡親戚贈遺悉用酒鮓唯以老鮓爲至愛

異味

深廣及溪峒人不問鳥獸蛇蟲無不食之其間異味有好有醜山有鼈名鼈竹有鼠名鼈鵠鵠之足腊而煮之鯽魚之唇活而燙之謂之魚魂此其至珍者也至於遇蛇必捕不問短長遇鼠必執不別小大蝙蝠之可惡蛤蚧之可畏蝗蟲之微生悉取而燎食之蜂房之毒麻蟲之穢悉炒而食之蝗蟲之卵天蝦之翼悉鮮而食之此與甘帶嗜薦何異哉甚者則煮羊腎混不潔以爲羹名曰青羹以試賓客之心客能忍食

則大喜不食，則以爲多猜。抑不知賓主之間，果誰猜耶？顧乃鮮豔，而腊孔雀矣。

齋素

欽人親死，不食魚肉，而食螃蟹、車螯、蠻螺之屬，謂之齋素，以其無血也。海南黎人親死，不食粥飯，唯飲酒食生牛肉，以爲至孝，在是。

買水沾水

欽人始死，孝子披髮、頂竹笠、攜瓶甕，持紙錢，往水濱號慟，擲錢於水，而汲歸浴尸，謂之買水。否則鄰里以爲不孝。今欽人食用，以錢易水，以充庖廚，謂之沾水者，避凶名也。邕州溪峒，則男女卒浴於川，號泣而歸。



嶺外代答卷七

香門

沈水香

案萬成大桂海虞衛志作登流眉

沈香來自諸蕃國者，真臘爲上，占城次之。真臘種類固多，以登流眉案萬成大桂海虞衛志作登流眉、丁流眉、宋史作登流眉，所產香氣味馨郁，勝於諸蕃。若三佛齊等國所產，則爲下岸香矣。以婆羅蠻香爲差勝，下岸香味皆腥烈，不甚貴重。沈水者，但可入藥，鮮交趾與占城鄰境，凡交趾沈香至欽皆占城也。海南黎母山峒中亦名士沈香，少大塊，有如幽栗角，如附子，如芝菌，如茅竹葉者，皆佳。至輕薄如紙者，入水亦沈。萬安軍在島正東，鍾朝陽之氣，香尤濃，藉清遠，如蓮花梅英之類。焚一銖許，氣翳彌室，翻之四面，悉香。至煤燼，氣不焦。此海南香之辨也。海南自難得，省民以一牛於黎峒博香一擔歸，自差擇得沈水十不一二。頃時香價與白金等，故客不販而宦遊者亦不能多買。中州但用廣州船上薑香耳。唯登流眉者可相詔頤山谷香方，率用海南沈香，蓋識之耳。若夫千百年之枯株中，如石如杵，如拳如肘，如奇禽龜蛇，如雲氣人物，焚之一銖，香滿半里，不在此類矣。

蓬萊香

蓬萊香出海南，卽沈水香結未成者，多成片，如小笠及大菌之狀，極堅實，狀類沈香。惟入水則浮，氣稍輕。

清價亞沈香，剝去其背帶木者，亦多沈水。

鵝鴨斑香

鵝鴨斑香亦出海南蓬萊好箋香中，槎牙輕鬆，色褐黑而有白斑，點點如鵝鴨腿上毛氣尤清婉。

箋香

箋香出海南者，如蝟皮漁蓑之狀，蓋出諸修治香之精鍊於刺端，大抵以斧斫以爲坎，使膏液凝泣於痕中，膏液垂而下，結巉巖如攢鍼者，海南之箋香也。膏液湧而上，結平闊如盤盂者，蓬萊箋也。其側結者必薄，名曰蟹殼香，廣東船上生熟速結等香，當在海南箋香之下。

衆香

光香出海北及交趾，與箋香同多聚於欽州，大塊如山石枯槎，氣蟲烈如焚松檜，桂林供佛賓筵，多用之。沈香出交趾，以諸香草合和蜜調，如薰衣香，其氣溫麝，然微昏鈍。排草香出日南，狀如白茅，香芬烈如麝香，亦用以合香，諸草香無及之者。橄欖香出廣州及北海，橄欖木節結成狀如黑膠饴，獨有清烈出塵之意，品格在黃連楓香之上。桂林東江有此，居人采香賣之，不能多得，以純脂不雜木皮者爲佳。欽香味猶淺薄，其木葉如冬青而差圓，皮如楮皮而差厚，花黃而小子青而黑，人以斧斫木爲坎，膏凝於痕，遂採以爲香，香之爲香良苦哉。

零陵香

零陵香出猛洞及靜江融州象州凡深山木陰沮洳之地皆可種也逐節斷之而裁其
案試文武傷也从戈才聲亂才切其葉隨手生矣春暮開花結子即可割薰以煙火而陰乾之商人販之好事者以爲座褥臥薦相傳言在嶺南不香出嶺則香謂之零陵香者靜江舊屬零陵郡也

蕃梔子

蕃梔子出大食國佛書所謂蕃菊花是也海蕃乾之如染家之紅花也今廣州龍涎所以能香者以用蕃梔故也又深廣有白花全似梔子花而五出人云亦自西竺來亦名蕃菊此說恐非是

樂器門

平南樂

廣西諸郡人多能合樂城郭村落祭祀婚嫁喪葬無一不用樂雖耕田亦必口樂相之蓋日間鼓笛聲也每歲秋成衆招樂師教習子弟聽其音韻鄙野無足聽唯潯州平南縣係古龜州有舊教坊樂甚繁異時有以教坊得官亂離至平南教土人合樂至今能傳其聲

猺樂器

猺人之樂有盧沙銃鼓胡盧笙竹笛盧沙之制狀如古簫編竹爲之縱一橫八以一吹八伊囁其聲銃鼓乃長大腰鼓也長六尺以燕脂木爲腔熊皮爲面鼓不響鳴以泥水塗面卽復響矣胡盧笙橫竹於瓢吹之嗚嗚然笛韻如常笛差短大合樂之時衆聲雜作殊無翕然之聲而多繁竹笛以相勵樂跳躍以相之

腰鼓

靜江腰鼓最有聲腔，出於臨桂縣職山鄉。其土特宜，鄉人作窖燒腔，鼓面鐵圈，出於古縣。其地產佳鐵，鐵工善煅，故圈勁而不撓。其皮以大羊之革，南多大羊，故多皮。或用蚺蛇皮鞔之，合樂之際，聲響特遠。一面鼓已若干面矣。

銅鼓

廣西土中銅鼓，耕者屢得之。其製正圓，而平其面，曲其腰，狀若烘籃，又類宣座，面有五蟾，分據其上，蟾背累蹲，一大一小相負也。周圍款識，其圓紋爲古錢，其方紋如織簟，或爲人形，或如琰璧，或尖如浮屠，如玉林，或斜如豕牙，如鹿耳，各以其環成章，合其衆紋。大類細畫圓陣之形，工巧微密，可以玩好。銅鼓大者闊七尺，小者三尺。所在神祠佛寺皆有之。州縣用以爲更點，交趾嘗私買以歸，復埋於山，未知其何義也。按廣州記云：俚獠鑄銅爲鼓，唯以高大爲貴，而闊丈餘，不知所鑄果在何時。按馬援征交趾，得駱越銅鼓，鑄爲馬，或謂銅鼓鑄在西京以前，此雖非三代彝器，謂鑄當三代時可也。亦有極小銅鼓，方二尺許者，極可愛玩，類爲士夫搜求無遺矣。

桂林鼈

桂林鼈隊，自永平時名聞京師。曰靜江諸軍艦，而所在坊巷村落，又自有百姓儻，嚴身之具甚備，進退言語，咸有可觀視。中州裝隊，仗似優也。推其所以然，蓋桂人善製戲面，佳者一直萬錢。他州貴之如此，宜其

聞矣。

白巾鼓樂

南人難得烏紗，率用白綺爲巾。道路彌望白巾也。北人見之，遽訝曰：「南癡疾殺人，殆比屋制服者歟？」又南人死亡，鄰里集其家，鼓吹窮晝夜，而制服者反於白巾上綴少紅線以表之。嘗聞昔人有詩云：「簫鼓不分憂樂事，衣冠難辨吉凶人。」是也。

寶貨門

珠池

合浦產珠之地，名曰斷望池，在海中孤島下去岸數十里。池深不十丈，漁人沒而得蚌剖而得珠，取蚌以長繩繫竹籃，遺之以沒。既拾蚌於籃，則振繩令舟人汲取之。沒者亟浮就舟，不幸遇惡魚，一攫之血浮於水面，舟人慄哭知其已葬魚腹也。亦有惡魚而急浮至傷股斷臂者。海中惡魚，莫如刺紗，謂之魚虎。蠻所甚忌也。蠻家自云：海上珠池，若城郭然，其中光怪不可向邇，常有怪物喙口吐翕，固神靈之所護持。其中珠蚌，終古不可得者。蚌溢生於城郭之外，故可採耳。所謂珠熟之年者，蚌溢生之多也。然珠生熟年，百不一二，耗年皆是也。珠熟之年，蠻家不善爲價，冒死得之，盡爲黠民以升酒斗粟一易數兩，既入其手，即分爲品等，銖兩而賣之。城中又經數手，乃至都下，其價遞相倍蓰。至於不貲，採珠在官有禁州，以廉名，謂其足以貪也。史稱孟嘗守合浦，珠乃大還，爲廉吏之應。二十年前有守甚貪，而珠亦大熟，雖物理無驗，然

此以清名至今，彼與草木俱腐耳。噫！孰知孟嘗還珠之說，非柳子厚復乳穴之說乎？東海廣中，亦有珠池，僞劉置軍採之，名媚川都，死者甚多。太祖皇帝平嶺南，廢其都爲靜江軍。

蛇珠

乾道初，欽州村落婦人黃氏，曬禾棚屋上，忽一物飛鳴而來，墜其髻上，復墜禾中，光耀奪目，盤旋不已，就取乃一大珠，是夜光怪滿室，鄰里異之，正訪知而索焉，不得。聞之縣官，其家懼，取蒸熟，光遂隱。後欽有士人姓雷，得與赴省，以萬錢賒買往都下，賣湖歎曰：此蛇珠也，惜哉！雷以不售，攜歸還黃。今其珠故在，置之盤中，猶有微量映盤。

辟塵犀

欽人有住深山，得大蜈蚣蛻，一節尺餘，堅如鐵石，持歸，鷄犬皆驚，斷隙日影，更無霏埃。有博物者曰：是所謂辟塵犀者耶。

琥珀

人云：茯苓在地，千年化爲琥珀。欽人出家鋤山，忽遇琥珀，初不之識。或告之曰：此琥珀也。厥直頗厚，其人持以往博易場，賣之交阤，驟致大富。

硃砂

南海有蚌屬曰硃砂，形如大蚶，盈三尺許，亦有盈一尺以下者。惟其大之爲貴，大則隆起之處，心厚數寸。

切磋其厚可以爲杯甚大雖以爲瓶可也其小者猶可以爲環佩花朵之屬其不盈尺者如其形而琢磨之以爲杯名曰瀲灐則無足尚矣佛書所謂礎礎者玉也南海所產得非竊取其名耶

龍涎

大食西海多龍枕石一睡涎沫浮水積而能堅鮫人採之以爲至寶新者色白稍久則紫甚久則黑因至番禺嘗見之不薰不藉似浮石而輕也人云龍涎有異香或云龍涎氣腥能發衆香皆非也龍涎於香本無損益但能聚煙耳和香而用真龍涎焚之一銖翠煙浮空結而不散座客可用一翦分煙縷此其所以然者蜃氣樓臺之餘烈也

大貝

海南有大貝圓背而紫斑平而深縫縫之兩旁有橫細縫陷生縫中本草謂之紫貝亦有小者大如指面其背微青大理國以爲甲冑之飾且古以貝子爲通貨又以爲寶器陳之廟朝今南方視之與蚌蛤等古今所尚固不同耶

金石門

生金

廣西所在產生金藏宜昭藤江濱與夫山谷皆有之邕州溪峒及安南境皆有金坑其所產多於諸郡邕管永安州與交趾一水之隔爾鵝鴨之屬至交趾水濱遊食而歸者遺糞類得金在吾境水濱則無矣凡

金不自礦出，自然融結於沙土之中。小者如麥粒，大者如豆，更大如指面，皆謂之生金。昔江南遺趙韓王瓜子金，即此物也。亦有大如鷄子者，謂之金母。得是者，富固可知。交趾金坑之利，遂買吾民爲奴。今峒官之家，以大斛盛金鎮宅，博賽之戲，一擲以金一杓爲注。其豪侈如此，則其以金交結內外，何所不可爲矣。古人欲使黃金與土同價者，知本之言也。

丹砂水銀

昔葛稚川爲丹砂求爲勾漏令，以爲仙藥在是故也。勾漏今容州，則知廣西丹砂非他地可比。本草金石部，以湖北辰州所產爲佳。雖今世亦貴之。今辰砂乃出沅州，其色與廣西宜州所產相類，色鮮紅而微紫，與邕砂之深紫微黑者大異。功效亦相懸絕。蓋宜山卽辰山之陽故也。雖然，宜辰丹砂雖良，要非仙藥。葛稚川不求此也。嘗聞邕州石江溪峒歸德州大秀墟，有金纏砂，大如箭鏃，而上有金線縷文，乃真仙藥。得其道者，可用以變化形質。試取以煉水銀，乃見其異。蓋邕州燒水銀當砂十二三斤，可燒成十斤。其良者，十斤真得十斤。惟金纏砂八斤可得十斤。不知此砂一經火力，形質乃重何哉？是砂也，取毫末而繭之，色如鮮血，誠非辰宜可及。邕州溪峒砂發之年，中夜望之，隱然火光滿山。嗟夫！稚川知之矣。

煉水銀

邕人煉丹砂爲水銀，以鐵爲上下釜，上釜盛砂，隔以細眼鐵板，下釜盛水，埋諸地，合二釜之口於地面，而封固之，灼以爐火。丹砂得火化爲霧，得水配合轉而下墜，遂成水銀。然則水銀卽丹砂也。丹砂稟生成

之性有陰陽之用能以獨體化爲二體此其所以爲聖也然丹經乃有真汞何哉余以爲丹砂燒成水銀故已非真汞岱州左右溪峒歸德州大秀墟有一丹穴真汞出焉穴中有一石壁人先鑿竅方二三寸許以一藥塗之有頃真汞自然滴出每取不過半兩許所塗之藥今忘其名矣是色紅粉與水銀白青之色殊異其倍亦重於水銀嗟夫學仙得此其至寶歟

銀朱

桂人燒水銀爲銀朱以鐵爲上下釜下釜如盤孟中置水銀上釜如蓋頂施竊管其管上屈曲垂於外二釜函蓋相得固濟既密則別以水浸曲管之口以水灼下釜之底水銀得火則飛遇水則止火燒體乾白色變而丹矣其上曰頭朱次曰次朱次者不免雜以黃丹也

銅

史稱駱越多銅銀交州記曰越人鑄銅爲舶廣州記曰俚僚鑄銅鼓聞交趾及占城等國王所居以銅爲瓦信知南方多銅矣今岱州有銅因無幾而右江溪峒之外有一蠻峒銅所自出也隔地數尺卽有礦故鑿人多用銅器嘗有獻說於朝欲與博易事下本路諸司謂且生邊釁奏罷之

銅綠

綠所在有之湖南之衡永廣東之韶廣西之邕皆有之蓋銅之苗裔也有融結於山巖翠綠可愛玩質如石者名石綠色鮮美淘取英華以供畫繪其次可飾棟宇又一種胞爛如碎土者名泥綠人不甚用

鉛粉

西融州有鉛坑，鉛質極美。桂人用以制粉，澄之以桂水之清，故桂粉聲天下。桂粉舊皆僧房鑄造，僧無不富，邪僻之行多矣。厥後經略司專其利，歲得息錢二萬緡，以資經費。華僧乃往衡嶽造粉，而以下價售之，亦名桂粉，雖其色不若桂，然桂以故發賣少遲。

鍾乳

靜江多巖洞，深者數里，岡穴之中，或高不可踰，或下不可隨。石脈瀉水，風所不及，悉成鍾乳。風之所及，雖曰結乳，色乃龜黃，不堪入藥。鍾乳之產也，乳牀連延，乳管倒垂，漸銳而長，瀉澑未已。冰筋咸列，長者一二尺，短者四五寸。人以竹管仰插而折取之，煮以七復之重湯，研以三旬之玉槌，試之肌紋以觀其細，澄之灰池而乾其體，日以烜之，其色微輕紅矣。者細妙服之，刀圭淪肌浹髓。凡乳通如鵝管，中無鷙齒，或破如爪甲，文如蟬翼者，上也。本草所謂石鍾乳是也。管無梢連石牀者，商孽也。乳牀之石，明潔如玉者，孔公孽也。三物本同種，本草以石鍾乳居玉石上秩，商孽、孔公孽皆在中秩，其功用必有優劣爾。今廣西帥司所造鍾乳粉，半二疎也。所謂鵝管石蓋什之一二耳。鍾乳所產，亦自有異。有石乳，有竹乳，有茅乳。石乳者，生於石上，石液相滋化而爲乳，色如冰玉，是爲最良。竹乳者，生於土石山洞，其上生竹，竹石相滋，液化爲乳，其色稍青。茅乳者，生於土石山洞，其上生茅，茅液相滋化而爲乳，其色微黃。皆可煮煉以爲溫藥。未煉之乳，澆性皆寒，且有石毒，惟假湯火之功去其毒性，乃能廢寒爲溫，以成上藥。今本草註家謂石乳溫，竹乳

平茅乳寒此說恐未必然產乳之穴雖曰深遠未嘗有蛇虺居之本草註家又謂深潤幽穴龍蛇毒氣所成斯大謬矣凡養煉乳水人或誤飲能使人失音其毒如此

滑石

靜江猺峒中出滑石今本草所謂桂州滑石是也滑石在土其爛如泥出土遇風則堅白者如玉黑如晉玉或琢爲器用而潤之以油似與玉無辨者他路州軍頗愛重之桂人視之如土織布粉壁皆用在桂一斤直七八文而已

石鷺

石鷺生於石遇雷雨則震躍而出蓋陽氣之感今湖南永州所產絕佳色黃而頭鷄翅脊了了然廣西象州江濱石中亦有之凡石中有嵌生如海蛆者極多非真石鷺也

石蟹石蝦

海南州軍海濱之地生石蟹、軀殼頭足與夫巨螯宛然蠍蟻之形也又有石蝦亦宛然蝦形皆藥物之所須也云是海沫所化理不可詰本草石蟹能療目而石蝦治療未詳

石梅

石梅生海中一叢數枝橫斜瘦硬形色真橢梅也雖巧化工造作所不能及根所附著如覆菌或云本是木質爲海水所化

石柏

石柏生海中。一幹極細。上有一葉。宛是側柏。扶疎無小異。根所附著如烏藥。大抵皆化爲石矣。此與石梅雖未詳可入藥與否。然皆奇物也。

嶺外代答卷八

花木門

果實附

桂

南方號桂海，秦取百粵，號曰桂林。桂之所產，古以名地。今桂產於欽賓二州。於賓者，行商陸運，致之北方。於欽者，舶商海運，致之東方。蜀亦有桂，天其以爲西方所資歟？桂之用於藥尚矣。枝能發散，肉能補益。二者用不同。桂性酷烈，易以發生。古聖人其知之矣。桂枝者，發達之氣也。質薄而味稍輕，故傷寒湯飲必用。桂枝發散，救裏最良。肉桂者，溫厚之氣也。質厚而味沈芳，故補益圓散，多用肉桂。今醫家謂桂年深則皮愈薄，必以薄桂爲良。是大不然。桂木年深愈厚耳，未見其薄也。以醫家薄桂之謬考於古方，桂枝肉桂之分，斯大異矣。又有桂心者，峻補藥所用也。始剝厚桂，以利竹捲曲，刮取貼木多液之處，狀如絰帶，味最沈烈。於補益尤有功。桂開花如海棠，色淡而葩小，結子如小橡子，取未放之葉乾之，是爲桂花，宛如茱萸，藥物之所緩，而食品之所須也。種桂五年乃可剝。春二月、秋八月，木液所剝之時也。桂葉比木樨葉稍大，背有直脈三道，如古圭製然。因知古人製字爲不苟云。

榕

榕，易生之木，又易高大。葉如槐，輪囷陸櫪，可覆數畝者甚多。根出半身，附幹而下，纏盤抱持以入土，故有

榕木倒生根之語，四時結子，葉脫亦無時，隨落隨生。春時亦搖落滿庭，禽鳥衝其子寄生它木上，便鬱茂。根鬚潛木身垂下至地，得土氣滋益盛壯，久則過其所寄，或遂包裹之。柳州柳侯廟庭前大榕，有桄榔一株生其中，相傳以爲異。知者以爲本榕子寄生桄榔上，歲久反抱合之，非異也。榕閩中亦有之。

沙木

沙木與杉同類，尤高大，葉尖成叢穗，小與杉異。猺峒中尤多，劈作大板，背負以出。與省民博易舟下廣東，得息倍稱。

燕脂木

燕脂木堅緻，色如燕脂，可鑄作器。融州及州峒桂林屬縣有之。

思福木

思福木，生兩江州峒，堅入清水中，百年不腐。峒人及交趾以爲弓弩、標槍之材，爲天下最。

檳榔

檳榔生海南黎峒，亦產交趾。木如櫻榔，結子葉圓，如柳條顆，叢綴其上。春取之爲軟檳榔，極可口。夏秋採而乾之，爲米檳榔，漬之以鹽，爲鹽檳榔。小而尖者，爲雞心檳榔。大而圓者，爲大瓶子，悉下氣藥也。海商販之，瓊管收其征，歲計居什之五。廣州稅務收檳榔稅，歲數萬緡。推是則諸處所收，與人之所取，不可勝計矣。

桃榔

桃榔木似櫻櫛，有節如大竹。青綠聳直，高十餘丈。有葉無枝，蔭綠茂盛。佛廟神祠，亭亭列立，如寶林然。結子葉間，數十穗下垂，長可丈餘。翠綠點綴，有如纓絡。極堪觀玩。其根皆細頸，堅質如鐵。鑑以爲器，悉成孔雀尾斑。世以爲珍。木身外堅，內腐。南人剖去其腐，以爲盛溜力省而功倍。溪峒取其堅，以爲弩箭。沾血一滴，則百裂於皮裏，不可撤矣。不惟其木見血而然，雖木液一滴，著人肌膚，卽徹身如鍼刺，是殆木性攻行於氣血也歟。凡木似櫻櫛者，有五：桃榔、檳榔、椰子、夔頭、桃竹。是也。檳榔之實可施藥物，裹之葉可以蓋屋。桃竹可以爲杖，椰子可以爲果蓏。若桃榔，則爲器用而可以永久矣。

椰子木

榔木，身葉悉類櫻榔。榔之屬，子生葉間，一穗數枚，枚大如五升器。果之大者，推此與波羅蜜耳。初採皮甚青嫩，已而變黃。久則枯乾，皮中子殼可爲器。子中穰白如玉，味美如牛乳。穰中酒新者，極清芳。久則渾濁不堪飲。

竹

嶺南竹品多矣，傑異者數種。因錄於後。斑竹，本出全之清湘。桂林屬縣皆有之。初生時，但點點淡青，譬如苔痕，久則青退而紫斑漸明。中有疊暉，江浙間斑竹，直一沁痕而無暉也。灑竹，一名憲筭竹。每一節上半，猶是常竹。其半筠膚纏繩，視之似生細毛。可借以磨琢爪甲。人取其經處，削成錯子，黑漆其裏，以相

贈遺用久利滑，醋浸少頃火炙乾復禮矣。老者彌渥然亦奇物。邕州兩江多有之。篠竹葉大且密，略如蘆葉，穠陰鬱然。它竹不逮，節上出小筍，拗破成枝，森深根旁大筍才出，經冬不已，極易種。芳竹其上生刺，南人謂刺爲筍，種之極易密，久則堅甚。新州素無城，以此竹環植，號曰竹城，交趾外城亦稱此竹。人面竹節密而凸，橫斜相間，每凸處突出長圓，宛如人面。近根之處幾百節，密密相聚，人亦採爲拄杖。釣絲竹身葉皆類篠竹枝梗柔弱，垂下搖曳數尺，如釣絲可愛。筍瘦而白，於食品最佳。箭竹山中悉有之。

諸郡治兵器各自足用，不求之備。北桂林十二枝箭爲錢二百，則其算賸可知矣。

荔枝圓眼

荔枝廣西諸郡所產，率皮厚肉薄，核大味酸，不宜曝乾，非閩中比。佳者莫如興化。海南荔枝可比閩中，不及興化矣。然廣西諸郡富產圓眼，大且多肉，遠勝閩中。邕州唯官莊所產，數根絕奇，肉厚味長，又當與興化敏玉比矣。靜江一種曰龍荔，皮則荔枝，肉則圓眼，其葉與味悉兼二果，色青時便熟，後但微黃，可蒸食，如熟栗不可生噉，令人發癟，多食能生痰，與荔枝同時。

紅鹽草果

邕州取新生草果，入梅汁鹽漬，令色紅，曝乾，薦酒，芬味甚高，世珍之。草豆蔻始結實如小舌，即擗取，紅鹽

八角茴香

八角茴香出左右江蠻峒中實類翹尖角八出不類茴香而氣味酷似但辛烈只可合湯不宜入藥中州士夫以爲薦酒咀嚼少許甚是芳香

餘甘子

南方餘甘子風味過於橄欖多販入北州方實時零落藉地如槐子榆莢土人乾以合湯意味極佳其木可以制器欽陽所產爲最蓋大如桃李清芬尤甚也世間百果無不軟熟唯此與橄欖雖齧尤堅脆可以比德君子南人有言曰餘甘一時熟獐一日肥其說蓋二物忽然有異則餘甘熟一時頃而復生獐肥一日而復瘦也欽州靈山縣一士人姓甯其祖父一日往山間忽見餘甘樹山如來禽紛熟飽餐快甚須臾便復青脆袖中猶攜數熟餘甘歸以示閭里至傳爲異事

石栗

石栗殼厚硬白褐色圓形如象子

杓栗

杓栗灰褐色正圓殼硬有柄似杓

蕉子

芭蕉極大者凌冬不凋中抽一株節節有花如芭苔花謝有實一穗數枚如肥阜長數寸去皮取肉軟爛如綠柿極甘冷四季實以梅汁漬暴乾按匾所云芭蕉乾是也鵝蕉則甚小亦四季實茅蕉小如鵝

蕉尤香嫩甘美南人珍之非他蕉比秋初方實

烏欖

烏欖如橄欖青黑色肉爛而甘亦可作蔬茹核差長其中仁味鬆美薦酒泛茶皆珍相餽遺者獨以核致遠微暴乾椎取仁方欖亦橄欖類三角或四角出兩江州峒

柚子

柚南州名臭柚大如瓜人亦食之皮甚厚穰極小打碑者捲皮蘸墨以代氈刷宜墨而不招紙頗便於用也赤柚子如橄欖皮青而肉赤春實

百子

南方果實以子名者百二十或云百子或云七十二子半是山野閒草木實江浙山中木子亦有之猿狹所食非佳實也因錄其識且可食者見於後羅尾子殼長數寸如肥皂內有二三瓣如皂子亦如橄欖皮有七重殼食甘美類熟栗亦曰羅梨子木竹子皮色形狀全似大枇杷肉甘美微爛子亦似枇杷核秋冬間實半青黃時採食收藏至三四月不壞人面子如大梅李生青熟黃核如人面兩目鼻口皆具肉甘酸宜蜜餞餚爲細瓣去核按匾煎之微有橘柚芳氣南果之珍也五稜子按匏成大桂海虞衛志作五棱子以義考之當形甚肥異瓣五出如田家碌碡狀皮黃甚薄味酸久則微甘朴切之或以蜜漬始可食圃中亦有之謂之羊桃黎臘子如大梅復似小橘味極酸或云自南蕃來番禺人多不用醯專以此物調羹其酸可知

又以蜜煎鹽漬、暴乾收食之。櫟苦子大如半升椀，歸視之，數十房攢聚成毬，每房有縫，如柏子之未裂，攢結甚堅，非刀斧不破。冬生色青，至夏紅破，其瓣食之微甘，苗叢高丈許，即成幹葉，長如菱蘆，刺生兩旁，土人密植以爲藩籬。或乾其葉去刺以織席臥之，誠有聲。搓擦子如錐粟，殼中多白毛，須搓擦而後可食，肉甘而微澀。地蠶子生土中，如小蠶，又似甘露子而不尖，味如梨藕而淡，亦以薦酒。尖炭子如烏李，山龍子色紅有刺，肉如荔枝，以下竝夏實。部蹄子按范成大桂海虞志作部蹄子如黃大石榴，木賴子如淡黃大李，黏子如指面大褐色，千歲子叢生如青黃李，味甘，赤棗子如酸棗，微長，味酸，生巖石上。藤韻子大如鳧卵，蒂紅色，以下竝秋實。古米子殼黃中有肉如米粒，一顆數十粒，殼子如青梅，味甘。藤核子生白藤上，如小蒲桃，一穗數百枚，淡黃色。木蓮子如胡桃皮殼皆紫褐色。蘿蔓子黃大如根柚，特乃子狀似榧子而圓長，亦類石蓮，色褐有殼，連殼蒸熟食之，味稍淡。不納子似黃熟小梅，絕易爛爛，則皮肉附核，核可爲經珠似菩提子，或云頃曾進入京師，被黜故以名。羊矢子色狀全似羊矢，味亦不佳，中有小核。日頭子狀如櫻桃，色如蒲桃，穗生，味極甘，寶州尤多。秋風子色狀俱似棟子，味酸澀，嵩州有之，或名隨風子，入藥用非此類。黃皮子如小棗，甘酸，佳味稍耐久，可致遠。朱圓子正圓深紅可玩，狀似苦棟子，又似無蒂棠毬子，微甘，冬實。粉骨子皮黃肉如粉，味酸，塔骨子，圓如大橘皮裏空虛，布衲子似李子而黃，黃肚子如小石榴，皮乾硬如沒石子，枯莖如棘，其上點綴布生，不甚堪食。蒲柰子狀如棗而差圓，味酸甜，其核可爲數珠。水泡子生水濱，小木白花似

玉蝴蝶，結子似金粟，而黃白無刺，味甘多液，肉理輕虛，如水泡然。水翁子，生水濱，大木葉似枇杷，大如指頭，色紅而甘。巾斗子，似海紅。沐浣子，似棠梨，色黃皮皺，可洗衣。牛精子，卽牛膝也。天威子，如橄欖而小，鹽糖和之可以作鮓。石胡桃，如石，其中肉無幾，味與北胡桃略同。頻婆果，極鮮紅可愛。佛手，所謂脣色赤，好如頻婆果是也。木饅頭，在中州蔓生枝葉閒，可以充藥物。在南州，則木生不生於枝葉，而繕生於本身，可以爲果實。二物其形相類，但蔓者肉薄多子，未熟先落。木生者肉厚，中有餡蜜，當其紅熟，亦頗可口。深廣難得佳果。公筵多用以備數人，乃附會其說曰：廣中公筵刻木爲饅頭，識其下曰某州公庫一樣若干，斯言過矣。

藤

藤，梧州產，大者可爲胡牀，小者圈爲盤孟。又其小而細長者，織以爲籠筐臥簟，耐久而文理可觀。其葉則以爲漁父之蓑。一領可終身用矣。藤州州治之外，嘗有古藤甚大，故以名州。

花藤

花藤，在西融州。藤中爛斑，其花紋如攢銀杏葉，或似牡丹花片，照之透明，乃鑑以爲器用，人多珍之。

膽瓶蕉

膽瓶蕉，一根唯一身，離地寸許，其身特大，而其上漸小，至葉乃大開敷，長大翠綠，正如膽瓶中插數枝蕉葉也。亭館列植，尤可愛玩，亦名象歸蕉，言如象歸然。

水蕉

水蕉不結實，南人取之爲麻縷片，乾灰煮用以織紝布之細者，一匹直錢數緡。

紅蕉花

紅蕉花葉瘦類蘆葦，中心抽條，條端發花葉數層，日拆一兩葉，色正紅如榴花荔枝，其端各有一點鮮綠，尤可愛，花心有點蒼黑色，春夏開至歲寒猶芳。

南山茶

南山茶，葩萼大倍中州者，色微淡，葉柔薄有毛，結實如梨，大如拳，中有數子，如肥皂子大，別自有一種，葉厚硬，花深紅，如中州所出者，競買戴。

素馨花

素馨花，番禺甚多，廣右絕少，土人尤貴重，開時旋掇花頭裝於他枝，或以竹絲貫之賣於市，一枝二文，人又以治魚腥水，一溉益佳。

石榴花

石榴花、南中一種、四季常開、夏中既實之後、秋深復又大發花、且實枝頭顆顆皺裂、而其旁紅英粲然併花實折併盤筵、極可玩。

史君子花

史君子花、蔓生、作架植之、夏開一簇、二十葩、輕盈似海棠、白與深紅相雜齊開、此爲最異、本草謂開時白久則紅、蓋未詳也。

添色芙蓉花

添色芙蓉花、晨開正白、已午微紅、夜深紅、歐陽文忠公牡丹譜有添色紅、與此同意、此花枝條經冬不枯、有高出屋者。

豆蔻花

豆蔻多矣、白豆蔻出南蕃、草豆蔻出邕州溪峒、而諸郡山間亦有豆蔻花、最可愛、其葉叢生如蘆葉、其開花抽一幹、有萼包之、萼去有花一穗、葉數十纏之、悉如指面、其色淡紅、如蓮花之未敷、又如葡萄之下垂、范石湖嘗作詩有貫珠垂寶絡、翦綵倒鸞枝之句、南人取花漬以梅汁日乾之、香味芳美、極有風致、余初見之意草蔻而味辛激人、亦取其子爲蜜果。

泡花

泡花、南人或名柚花、春來開葉圓白如大珠、既拆、則似茶花、氣極清芳、與茉莉素馨相逼、番禺人採以蒸

香風味超勝。桂林好事者或爲之。其法以佳沈香薄片劈著淨器中。鋪半開花與香層層相間。密封之。明日復易。不待花萎香竭也。花過乃已。香亦成。番禺人吳宅作心字香及瓊香用素馨茉莉法亦爾。大抵渴取其氣令自薰陶以入香骨。實未嘗以瓶釜蒸煮之。

曼陀羅花

廣西曼陀羅花。徧生原野。大葉白花。結實如茄子。而徧生小刺。乃藥人草也。盜賊採乾而末之。以置人飲食。使之醉悶。則挈篋而趨。南人或用爲小兒食藥去積甚峻。

拘那花

拘那花葉瘦長。略似楊梅。夏開淡紅花。一朵數十萼。繁如紫薇。花瓣有鋸文如翦金。至秋深猶有之。

水西瓜

水西瓜葉如蕡草。花黃。夏開。

裏梅花

裏梅花。卽木槿。有紅白二種。葉似蜀葵。采者連蒂包裹。黃梅鹽漬。暴乾以薦酒。故名。

玉脩花

玉脩花粉紅色。四季開。

月禾

欽州田家鹵莽，牛種僅能破塊。播種之際，就田點穀，更不移秧。其爲費種，莫甚焉。既種之後，不耘不灌。任之於天地，地暖故無月不種，無月不收。正二月種者曰早禾，至四月五月收。三月四月種者曰晚早禾，至六月七月收。五月六月種者曰晚禾，至八月九月收。而欽陽七峒中，七八月始種早禾，九十月始種晚禾，十一月十二月又種名曰月禾。地氣既暖，天時亦爲之大變，以至於此。

大蒿

大蒿，容梧道中久無霜雪處。蒿草不凋，年深滋長。大者可作屋柱，小亦中肩輿之杠。清屬王仲顯、沿檄失轎杠，從者研道旁木代之。行數里，輒脆折怪礪之，蒿也。古有蒿柱之說，豈其類乎？

都管草

都管草，一莖六葉，置室中，辟蜘蛛，不敢入。

蛆草

蛆草高一二尺，狀如茅。夏月插一枝簷簷中，蚊蠅不近。食物亦不速腐。柳州有之。

銅鼓草

銅鼓草，其實大者如瓜，小者如菜菔。治瘍毒，醋磨塗之。

石髮

石髮出海上，纖長如絲縷，淺綠色，置食肴中，極可愛。然易爛而薄於味。

區菜

區菜出海上。細如荇帶。區如薤韭。長一二尺。亦宜盤筯。比石髮差有味。筋韧可咀嚼。

胡蔓草

廣西妖淫之地多產惡草。人民亦稟惡德。有藤生者曰胡蔓。葉如茶。開小紅花。一花一葉。揉其葉瀆之水。涓滴入口。百竅潰血而死矣。愚民私怨茹以自斃。人近草側。其葉自搖。蓋其惡氣好攻人氣血如此。人將期死。採其葉心嚼而水吞之。面黑舌伸。家人覺之。急取抱卵不生雞兒。細研和以麻油。抉口灌之。乃盡吐出惡物而甦。小遲不可救矣。若欲驗之。齒及爪甲奇探銀釵咽中。銀變青黑者是也。人死焚尸。次日灰骨中已生胡蔓數寸。此等惡種火不能焚。天之生物有如此者。朝廷每歲下廣西尉司除胡蔓。此亦人代天工之意。勿謂其不可去。而一不問也。



嶺外代答卷九

禽獸門

象

交趾山中有石室，唯一路可入。周圍皆石壁。交人先置芻豆于中，驅一雌馴象入焉。乃布甘蔗于道以誘野象。俟來食蔗，則縱馴雌入野象羣，誘之以歸。既入，因以巨石窒其門。野象饑甚，人乃緣石壁飼馴雌。野象見雌得飼，始雖畏之，終亦狎而求之。益狎，人乃鞭之以筆，少馴則乘而制之。凡制象必以鈎。交人之馴象也，正跨其頸，手執鐵鈎以鈎其頭。欲象左，鈎頭右；欲右，鈎左。欲卻鈎額，欲前不鈎。欲象跪伏，以鈎正案其脰，復重案之，痛而號鳴。人見其號也，遂以爲象能聲曉焉。人見其羣立而行列齊也，不知其有鈎以前卻左右之也。蓋象之爲獸也，形雖大而不勝痛。故人得以數寸之鈎馴之，久久亦解人意。見乘象者來，低頭跪膝，人登其頸，則奮而起行。象頭不可俯，頸不可回。口隱於頤，去地猶遠。其飲食運動，一以鼻爲用。鼻端深大，可以開閉。其中又有小肉夾，雖芥子亦可拾也。每以鼻取食，即就爪甲擊去泥垢，而後捲以入口。其飲水亦以鼻吸而捲納諸口。村落小民新齧熟野象，逐香而來，以鼻破壁而入飲人之大患也。象足如柱，無指而有爪甲。登高山、下峻阪、渡深水，其形擁腫，而乃捷甚。交人呼而驅之，似能與之言者。貢象之役，一象不甚馴，未幾病死，呻吟數日，將死，回首指南而薨。其能正邱首如此，是亦非凡獸也。欽州境內亦有

之象行必有熟路人於路傍木上施機刀下屬於地象行觸機機刀下擊其身苟中其要害必死將死以牙觸石折之知牙之爲身矣也苟非要害則負刃而行肉潰刃脫乃已非其要害而傷其鼻者亦死蓋其日用無非鼻傷之則療不可合能致死也亦有設陷穿殺之者去熟路丈餘側斜攻土以爲穿使路如舊而象行不疑乃墮穿中世傳象能先知地之虛實非也第所經行必無虛土耳象目細畏火象羣所在最害禾稼人倉卒不能制以長竹繫火逐之乃退象能害人羣象雖多不足畏惟可畏者獨象也不容於羣故獨行無畏遇人必肆其毒以鼻捲人擲殺則以足踐人血透肌而以鼻吸飲人血人殺一象衆斂其肉惟鼻肉最美爛而納諸糟邱片腐之食物之一雋也象皮可以爲甲堅甚人或條截其皮砸直而乾之治陟廳吏卒始散乃知虎也

虎

虎廣中州縣多有之而市有虎欽州之常也城外水壕往往虎穴其間時出爲人害村落則晝夜羣行不以爲異余始至欽已見城北門衆逐虎頗訝之未幾白事提學司投宿寧越驛亭中率是虎跡予怪而問焉答曰吾與妻子臥壁下虎夜掉尾擊吾壁以鼻嗅人氣垂涎下云比還欽時雨潦壞城虎入城負大豕無虛夕因玩狎不復驚忽有虎晚入安遠縣衙坐戒石前守宿吏卒不以爲意直相與擲撞之少焉緩步陟廳吏卒始散乃知虎也

天馬

邕州溪峒七源州、有天馬山、山上有野馬十餘匹、疾迅若飛、人不能邇、熙寧閒、七源知州縱牧馬于山後、生駒駿甚、自後屢縱、迄不可得矣。

蠻馬

南方諸蠻馬皆出大理國、羅殿、自杞、特磨、歲以馬來、皆販之大理者也。龍羅張石方五部蕃族、謂之淺蕃、亦產馬、馬乃大口項軟趾高、真駒駘爾、唯地愈西北則馬愈良、南馬狂逸奔突、難於駕馭、軍中謂之拚命、擣一再馳逐、則流汗被憚、不如北馬之耐、然忽得一良者、則北馬雖壯、不可及也。此豈西域之遺種也耶、是馬也、一匹直黃金數十兩、苟有必爲峒官所買、官不可得也。蠻人所自乘、謂之座馬、往返萬里、跬步必騎、馳負日重、未嘗困乏。蠻人寧死不以此馬予人、蓋一無此馬、則不可返國、所謂冥堪託死者、聞南詔越巂之西、產善馬、日馳數百里、世稱越巂駒者、蠻人座馬之類也。聞今溪峒有一黃淡色馬、高止四尺餘、其耳如人指之小、其目如垂鈴之大、鞍轡將來、體起拳筋、一動其韁、倏忽若飛、跳躍越塹在乎一喝、此馬本蠻王騎來、偶病黃峒官以黃金百兩買而醫之、後蠻王再來見之歎息、欲以金二百兩買去、勿予之矣、嘗有一勢力者、欲強取之、峒官鑿裂其蹄、然不害於行也、此馬希世之遇、何止來十一於千萬哉、謂可必得、害事多矣。

果下馬

果下馬、土產小驥也、以出德慶之瀧水者爲最高、不踰三尺、駒者有兩脊骨、故又號雙脊馬、健而善行、又

能辛苦。瀘水人多擎牧。歲七月十五日。則盡出其所蓄。會江上。馳聘角逐。買者悉來聚觀。會畢。即議價交易。它日則難得矣。湖南邵陽營道等處。亦出一種低馬。短項如豬。駕鈍不及瀘水。兼亦稀有。雙脊者。

蠻犬

蠻犬如獵狗。警而馴。諸蠻以馬互市於橫山。皆作茅舍野次。謂之茅寮。率攜一犬以自防。盜莫敢近。

猱

猱有三種。金線者黃玉面者黑者面亦黑。金線玉面皆難得。或云純黑者雄。金線者雌。又云雄能嘯。雌不能也。子能抱持其母。牢不可拆。人取之。射殺其母。取其子。子猶抱母皮不釋。獵猱者可以戒也。猱性不耐著地。著地輒瀉以死。煎附子汁與之。卽止。登木好以兩臂攀枝上。不甚用足。終日纏繆然。

白鹿

欽州平野多鹿。中有一鹿。大軀長角。玉雪其色。嘗墮蘇氏網羅。幾擒而逸。淳熙乙未二月。有野婦把一白驥鬻於市。太守鄭以錢七百得之。日取生牛乳飼之。長大。乃雌爾。然驯狎可愛。鄭求得張曲江進白鹿故事。作金羈絡掩尾之飾。將以進呈而不遂。然欽之白鹿。自昔有之。不足異也。南方野鹿成羣。望人不去。近逼之而後走。性癡畏聞人氣。人在上風。其走必速。下風則走遲。獵者從下風逼射之。

雉

深廣山中有獸似豹。常仰視天。雨則以尾塞鼻。南人呼爲倒鼻鼴。捕得則寢處其皮。士夫珍之以藉胡牀。

今冕服所畫雖是也夫獸能以尾望鼻觀雨斯亦智矣其登於三代之服章厥有由哉

人熊

廣西有獸名人熊乃一長大人也被髮裸體手爪長銳常以爪割樹木取其脂液塗身厚數寸用以禦寒暑敵搏噬是獸也力能搏虎每踐踔而行道遇一木根必拔去而後行登木而食橡栗必折盡而後已余夜宿昭州灘下聞山中拔木聲舟師急移舟宿遠岸問之曰人熊在山能卽船害人又云往年融州有人熊渡水人以爲獸也拏舟刺之以鎗熊就水接鎗折之遂破人舟其在山中遇人則執人手以舌掩面而笑少焉以爪抉人目睛而去嘗有人熊日坐于猺人之門猺人每投以飯因起機心以大木兩片緊合之中挿一杙令兩木中間次日人熊至見杙而怒跨坐拔去杙而兩木合正害其勢乃死猺人急去木以米泔洗地繼而雖至求雄莫辨所殺之處遂不爲害不然雖猺人亦不可得而安居矣

山豬

山豬卽毫豬身有棘刺能振發以射人二三百爲羣以害苗稼州峒中甚苦之

花羊

花羊南中無白羊多黃褐白斑如黃牛又有一種深褐黑脊白斑全似鹿羣山谷望之真鹿也看鑑中羊皮率青黯可惜以無白羊故也

綿羊

綿羊、出邕州溪峒、及諸蠻國、與朔方胡羊不異、有白黑二色、毛如繭續、剪毛作繩、尤勝朔方所出者。

大狸

凡狸之類不一、多有穴於城郭園林者、其大倍貓、身有黑點、鳴號洶洶、處處有之、邕別有一種大狸、其毛色如金錢豹、但其錢差大耳、彼人云、歲久則爲豹、其文先似之矣、此皮可寢、及擾胡牀、其大幾及豹也。

風狸

風狸、狀如黃猿、食蜘蛛、晝則拳曲如蟄、遇風則飛行空中、其溺及乳汁、主風疾奇效、有野夫籠一枚、詣賓守劉仔任、道晝伏不動、夜則奔躍於籠中、不休、需錢五十千、劉笑卻之。

仰鼠

欽州有鼠、形如豬、黑身白腹、仰生土中、攻土而行、逆順前卻、迅疾難捕、人見土面迤邐墳起、即知其爲鼠、急以鑊斷其前後、夾掘而擒之、不然、一聞鑊聲、退而遁矣。

香鼠

香鼠至小、僅如指擘、大穴於柱中、行地上、疾如激箭、官舍中極多。

石鼠

石鼠、專食山豆根、賓州人捕得、以其腹乾之、治咽喉疾效如神、功用勝山豆根、謂之石鼠肚。

麝香

白蠛州溪峒來者名上麝氣躁烈不及西香然比年西香多僞雜一臍化爲十數枚豈復有香南麝氣味雖劣以不多得得爲珍貨不暇作僞入藥宜有力

懶婦

懶婦世傳織婦懶者所化狀如山豬而小喜食禾苗田夫以機軸織紝之器挂田所則不復近安平七源等州有之

山獮

山獮出宜州溪峒俗傳爲補助要藥峒人云獮性淫毒山中有此物凡牝獸悉避去獨無偶抱木而枯峒獠尤貴重云能解藥箭毒中箭者研其骨少許傅立消一枚直金一兩人或買但得殺死者功力甚劣抱木枯者土人自稱得之徒有其說而已

山鳳凰

鳳凰生丹穴丹穴南方也今邕州溪峒高崖之上人跡不至之處乃有鳳凰巢焉五色成章大逾孔雀如今所畫而頭特大百鳥遇之必環列而立其頂之冠常盛水雌雄更飯未始下人間南人謂之山鳳凰石湖虞衡志云兩江深林有卵雄者以木枝雜桃膠封其雌于巢獨留一竅雄飛求食以飼之子成即發封不成室竊殺之此亦暴物

孔雀

孔雀世所常見者中州人得一則貯之金屋南方乃腊而食之物之賤于所產者如此膽能殺人以膽一滴害于酒齏之脣而酌以飲人亦死前志謂南方有大雀五色成文爲鸞鳳之屬孔者大也豈是物與

鸚鵡

古城產五色鸚鵡唐太宗時環土所獻是也案傳謂能禱寒有詔還之環王國即古城也余在欽嘗于羣守見白鸚鵡紅鸚鵡白鸚鵡大如小鵝羽毛有粉如蝴蝶翅紅鸚鵡其色正紅尾如烏鵲之尾然皆不能言徒有其表爾欽州富鸚哥頗慧易教土人不復雅好唯福建人在欽者時或教之歌乃真成韻音此禽南州羣飛如野鳥舉網掩羣樹以爲鮮物之不幸如此

鳥鳳

鳥鳳如喜鵲色紺碧頭毛類雞髮頭有冠垂二弱骨各長一尺四五寸其杪始有羽毛一簇冠尾絕異大略如鳳鳴聲清越如笙簫能度曲妙合宮商教之精熟至能終一闋又能爲百蟲之音生左右江深峒中極難得飼以生物故又難蓄南方珍禽之尤然舊傳未之紀當爲難得人罕識云

秦吉了

秦吉了如鸚鵡紺黑色丹喙黃距目下連項有深黃文頂毛有縫如人分髮能人言及咳嗽謳吟聞百蟲音隨輒效學比鸚鵡尤慧大抵鸚鵡聲如兒女秦吉了聲則如丈夫出邕州深峒中唐書林邑出結遼烏林邑今占城去邕欽州但隔交趾疑即吉了也白樂天諷諫又自有秦吉了詩

翡翠

翡翠產于深廣山澤間，穴巢于水次，一整之水止一雌雄，外有一焉必爭界而鬪死。人乃用其機養一媒，繫諸左手以行澤中。翡翠見之，就手格鬪，不復知有人也。乃以右手取羅掩之，無能脫者。邕州右江產等翡翠，其背毛悉是翠青，窮侈者用以撚織。

雁

雁、秋南春北，謂之陽鳥。吳中太湖雖盛夏亦有畱雁，蓋太湖深處至涼，且有魚蚌可戀也。衡陽有回雁峯，云雁至此不復南征。余在靜江數年，未嘗見一雁，益信有回雁之說。蓋靜江雖無瘴癘，而深冬多類淺春，故雁不至，況于深廣常燠之地乎。

靈鵲

邕州有禽曰靈鵲，狀如啄木而差大，巢于木穴，生子其中。人以木窯其穴，鵲至無所歸，乃至地禹步，俄而所窯躍去，乃得入穴。其後以灰布地而窯其穴，欲觀其步而效之。鵲既步急以爪畫步而入穴，人欲效之無由。

骨噪

邕州有禽曰骨噪，似竹雞，生茅茨中，人卽其巢原本兩字，折其骨母原本兩字，乃一字藥，如馬腦大方寸許，原本兩字。之骨復能步人逐其母，奪其藥，竟不知原本兩字。以用，但以囊盛藥爲小兒辟惡，久而藥亦復不見，謹收不

過原本

鳩

邕州溪峒深山有鳩鳥形如鶲而差大黑身紅目舌如羯鼓唯食毒蛇鳩禹步遇蛇其聲邦邦然蛇入石穴鳩于穴外禹步有頃石碎吞之凡山有鳩草木悉枯鳩集于石其石必裂或云鳩秋冬脫羽人以銀作爪勾取致之銀瓶否則手燭欲加鳩于人以一羽致酒卽死

春蟲

白烏鵲之屬秋則自北而南春則自南而北猶雁然而地不同靜江府人謂之春蟲欽州蓋春蟲南歸之地也靜江之興安靈川縣其人善捕池塘平野高木淺林無非機罝春蟲北出必過二縣欲宿彷徨不敢下其捕法云先訓一春蟲爲媒則于水塘邊插爲禽若啄若立之勢以爲之誘又于塘側跨水結小低屋以蔽人形每晚殺小蝦蟆數隻置之小屋中忽見春蟲羣飛縱媒誘之以下其媒能前後邀截必誘入塘乃止噫此禽真良友者耶春蟲旣已下人乃于小屋中暗擲蝦蟆媒先來食人乃設機械附于水中鉤其脚而取之其爲械也製鐵鉤如觀鬚當其折曲處又折爲小環如鵠目令稍缺可以鉤陷春蟲之脛于鉤之柄立小梃寸許以爲暗行水中度春蟲近屋取食人以鐵鉤暗鉤其足脛微張鉤合脛陷入小環而不得脫乃急于水裏拽入小屋拔其六翮復縱焉已不能飛姑留之以疑衆禽少畱乃得以次取之

鶴子

廣西海山多鷄雷化間羅爲鮓至富也。鷄乃海中黃魚所化成者。黃魚當秋冬羽翼以化于水中。俟北風拍岸遂登岸成鷄。便能行入茅葦。海南人捕得黃魚有半化爲鷄者。莊周鵠鷄之喻小大不同。其義一也。余嘗推其故物未有非類而能化者。鳥魚皆生于陰豈非質異而性同歟。

鬪雞

芥肩金距之技見于傳而未之覩也。余還自西廣道番禺乃得見之。番禺人酷好鬪雞。諸番人尤甚。雞之產番禺者特鷺勁善鬪。其人飼養亦甚有法。鬪打之際各有術數。注以黃金觀如堵牆也。凡雞毛欲疏而短頭欲豎而小足欲直而大身欲疏而長目欲深而皮厚徐步耽視毅不妄動望之如木雞如此者每鬪必勝人之養雞也結草爲墻使立其上則足嘗定而不傾置米高于其頭使聳膺高啄則頭常豎而觜利割截冠縫使敵雞無所施其觜剪刷尾羽使臨鬪易以盤旋常以翎毛攬入雞喉以去其涎而掬米飼之或以水噀兩腋調飼一一有法至其鬪也必令死鬪勝負一分死生卽異蓋鬪負則喪氣終身不復能鬪卽爲賤賣矣然常勝之雞亦必早衰以其每鬪屢濱死也。鬪雞之法約爲三開。始鬪少頃此雞失利其主抱雞少休去澣飲水以養其氣是爲一閒再鬪而彼雞失利彼主亦抱雞少休如前養氣而復鬪又爲二閒最後一閒兩主皆不得與。二雞之勝負生死決矣。雞始鬪奮擊用距少倦則盤旋相啄一啄得所觜牢不捨副之以距能多如是者必勝其主喜見于色番人之鬪雞又乃甚焉所謂芥肩金距真用之其芥肩也。末芥子移于雞之肩腋兩雞半鬪而倦盤旋伺便互刺頭腋下翻身相啄以有芥子能昧敵雞之目故

用以取勝其金距也。薄刃如爪鑿柄于雞距，奮擊之始，一揮距或至斷頭，蓋金距取勝于其始，芥肩取勝于其終，季孫於此能無怒耶？小人好勝，爲此凶毒，使微物不得生，自三代已然。

長鳴雞

長鳴雞，自南詔諸蠻來。一雞直銀一兩，形矮而大，羽毛甚澤，音聲圓長，一鳴半刻。

潮雞

廣有潮雞，潮至則啼，身小足矮，昔余襄公靖詩云：客聽潮雞迷早夜，人瞻鸞母識陰晴，是也。

枕雞

欽州有小禽一種，大如初生雞兒，毛飼純黑，項下有橫白毛，向晨必啼，如雞聲而細，人置枕間，以之司晨，亦名曰鶡子，余命曰枕雞。

翻毛雞

雞翮皆翻生，轉轉向外，雌雄皆然，二廣皆有之。

嶺外代答卷十

蟲魚門

蚺蛇

蚺蛇能食獐鹿。人見獐鹿驚逸，必知其爲蛇。相與赴之，環而詬訶，呼之曰「姊」。徒架反謂姊也。蛇聞歌卽僵，首人競採野花置蛇首。蛇愈伏，乃投以木株。蛇就枕焉。人掘坎枕側，蛇不顧也。坎成，以利刃一揮，墮首於坎，急壓以土，人乃四散。食頃，蛇身騰擲，一方草木爲櫛。既死，則剝其皮以鞭鼓，取其膽以和藥，飽其肉而棄其膏。蓋嘗能奪人陽道也。人謂大風油，卽稱蚺蛇膏。非是。夫蛇之死，可謂愚矣。然天地之間，物理有所不可曉者，以蛇之大而甘受制，誠愚然。特其未見水耳。彼一見水，必夭矯其形，不受制伏，起而吞人，雖不遇水，有小兒在側，亦忽吞之，是其死也。殆有機縛者存，非蛇之愚也。

六目龜

聞欽七洞有六目龜，欣然異之。因人求得，乃眞目之上，有四僞目耳。所謂僞目，卽頭上金黃花紋圓長，中黑似日也。然僞日與眞日排比，端正不偏，無一不然。亦足愛矣。常飼養之不死，是龜旬日卽死，是殆不以飼養龜而然歟。

蠶瑞堦

欽海有介屬曰鼈。大如車輪。皮裏有薄骨十三。如璫瑁。今人用以爲箠刀筒子者是也。璫瑁背甲亦十三片。自然成斑紋。世言鱉血成斑。斯言妄矣。

鱉音璫

欽州海濱有穴處水族曰鱉。狀如龍而無角。長五尺許。蠻人得之。熟而售諸市。管界巡檢劄昂者見而市之。將烹。同僚念其形似神物也。請縱之江。其未得水。則類死矣。一得水。則奮迅蹴踏。天矯滅沒。波頭爲起俄然而逝。彼玄燁其形而猶若是。況真龍哉。

鱗鰐魚

春水發生。鱗鰐大魚。自南海入江。至潯陽之境。龍門之下。或爲漁網所得。余東歸。將至番禺。有蟹急棹就舟。熟二鱗鰐求售。大者長六尺。小者四尺。脩骨修腮。口隱於頤。身無細鱗。上各有鋒刃。與凡魚不同。惻然念曰。神龍之碑。乃受制於人如此哉。問所鬻幾何。曰四百卽市而縱焉。始則舉首出水。少焉揚鬚掉尾。復舉首似顧。悠然而逝矣。

嘉魚

蒼梧大江之南山。曰火山。下有丙穴。嘉魚出焉。所謂南有嘉魚。詩人傳之也。嘉魚形如大鯢。魚身腹多膏。其土人煎食之甚美。其煎也。徒置魚於乾釜。少焉膏溶。自然煎熬。不別用油。謂之白裹。

河魚

左氏河魚腹疾語，迄無定說。余仕古縣，常食市魚，廚者曰：此魚病肚不堪食。剖視之，滿腹黃水也。後汎舟見一魚死於舟側，舟人曰：此魚病肚死矣。問何謂病肚？曰：凡物皆有疾，魚在水無他疾，唯病肚乃死。因悟申叔時河魚之說。

竹魚鰕魚

竹魚出灘水，狀似青魚，味如鱖魚。鰕魚亦出灘水，肉白而豐，味似鰕而鬆美。大抵南中魚品，如鯉鯽者甚多，而鰕竹二魚為珍。

鬼蛻蝶

鬼蛻蝶大如扇，四翅共徑六七寸，褐質間雜色晃然，下兩翅有翠點，尤光彩，好飛荔枝上。

黑蛻蝶

黑蛻蝶大如扇，橘蠶所化，翅墨黑而有翠綵一行，特為鮮明。北人或名元武蝶。

天鰐

南方有飛蟲，有翅如飛蛾，其尾如蟋蟀，色白，身長似小鰐。然夏秋之間，晚飛蔽天，墮水人以長竹竿橫江面，使風納之，如萍之聚，早乃掉舟搏取，縷肥肉合以為鮮，味頗美。然此夜墮水次，早即取，乃可用，稍遲一夕，已脫而化矣。

盛

余在欽，一夕燕坐，見有似蜥蜴而差大者，身黃脊黑，頭有黑毛，抱疎籬之杪，張額四顧，聳身如將躍也。適有士子相訪，因請問之，答曰：此名十二時，其身之色，一日之內，逐時有異。口嘗含毒，俟人過，則射其影，人必病。余曰：非所謂蠶者歟？生曰：然。書傳所載，即是物也。未幾，余染瘴幾殆。

古蹟門

韶石

韶石山，在韶州東北，高七十丈，闊一百五十丈。昔虞舜登此石奏韶樂，因以名州。晉永和二年，有飛仙遊其上，張循州詔石圖，有三十六石名，因具於左：

新婦石、毬門石、大禾倉石、小禾倉石、太平石、
盤龍石、獅子石、侍石、上鱗魚石、下鱗魚石、帽子峯石、鳳閣石、羅仙峯石、雙闕石、
馬鞍石、四接石、使石、三峯石、桃石、大香爐石、小香爐石、駱駝石、奏樂石、樓閣石、
寶蓋石、硯面石、虹霓石、朝仙峯石、覆船石、五羊石、圓石巖、鍾石、續石、石臼、石井。

映一

秦城

湘水之南，靈渠之口，大融江小融江之閒，有遺堞存焉，名曰秦城。實始皇發謫戍五嶺之地。秦城去靜江城北八十里，有驛在其旁。張安國紀之詩曰：南防五嶺北防胡，猶復稱兵事遠圖。桂海冰天塵不動，誰知壠上兩耕夫。北二十里，有險曰嚴關，羣山環之，烏道徹通，不可方軌。此秦城之遺蹟也。形勢之險，襟喉之

會水草之美，風氣之佳，異宿兵之地，據此要地，以臨南方，水已出渠，自是可以方舟而下，陸苟出關，自可以成列而馳，進有建瓴之利勢，退有重險之可蟠，宜百粵之君委命下吏也。

綠珠井

鬱林州博白縣古白州也。晉石崇妾綠珠，實生焉。有井名綠珠，云其鄉飲是多生美女。異時鄉父老有識者聚而謀窺，是井後生女乃不甚美，或美必形不具。深山大澤，實生龍蛇，掩井之人亦云智矣。

古富州

古富州今昭州昭平縣，在灕江之濱，荆棘叢中，止有三家茅屋，及一縣衙，真所謂三家市也。有舟人登岸飲酒，遂宿茅屋家。夜半，覺門外託託有聲，主人戒之曰：毋開門，此虎也。奴起而視之，乃一乳虎，將數子以行，今爲縣乃爾。不知昔日何以爲州耶？

銅柱

漢馬伏波平交趾，立銅柱，爲漢極西界。唐馬總爲安南都護，夷獠爲建二銅柱於伏波之處，以明總爲伏波之嗣。是銅柱在安南矣。又唐何履先定南詔，復立馬援銅柱，接南詔。今大理國，則是銅柱復當在大理。又占不勞之地，南有大浦，有五銅柱山，形若倚蓋，西重巖，東崖海，接占不勞今占城也。然則銅柱又當在占城。聞欽壇古森峒與安南抵界，有馬援銅柱，安南人每過其下，人以一石培之，遂成丘陵。其說曰：伏波有誓云銅柱出交趾，滅培之懼其出也。又云：交趾境內有數銅柱，未知孰是。

陟屺寺

欽州靈山縣東南三十里有武利場俗傳唐則天母故里也去場不遠有陟屺寺遺址云則天念母爲建寺祈福之地猶有豐碑斷裂茅檜閒字畫略可辨其文則虛壁奉敕撰按則天父武士彟晉人母楊氏詳家何地后得志封榮國夫人榮國卒后出珍幣建佛廬以徼福然則陟屺之說固苦奇矣惜肇碑剥落不可考也然亦可疑肇袁州人奮跡武宗朝去則天固遠將奉何敕作記耶

交趾

記曰南方曰蠻雖題交趾有不火食者矣交州記曰交趾之人出南定縣足骨無節身有毛臥者更扶始得起今至欽見夫黑齒跣足皚其衣裳者人耳烏覩所謂足無節身有毛者哉人言道州侏儒今道州人七尺而昭州恭城縣與道接畛間產一二侏儒竊意南定縣如恭城也不然豈其人足皆無節而能更相扶耶間受戾氣遂以得名意當如此

儋耳

儋耳今昌化軍也自古爲其人耳長至肩故有此號今昌化曷嘗有大耳兒哉蓋南蕃及黎人人慕佛相好故作大環以墜其耳俾下垂至肩實無益於耳之長其竅乃大寸許

冰井火山

梧州城東有方井二冰泉清冽非南方水泉比也謂之冰井其南隔江有火山下有丙穴嘉魚生焉元次

山嘗爲梧州有火山無火、冰井無冰之句。

蠻俗門

蠻俗

蠻夷人物強悍，風俗荒怪。中國姑羈縻之而已。其人往往勁捷能辛苦，穿皮履，上下山如飛。其械器有桶子甲、長槍矛、標偏刀、遇原原牌山各竹箭、桄榔箭之屬。民編竹苦茅爲兩重，上以自處。下居雞豚，謂之麻欄。生理苟簡，冬編鶴毛木棉，夏繕蕉竹麻紵爲衣。搏飯掏水以食，家具藏土窖以備寇掠。土產生金、銅、鉛、綠丹砂、翠羽、銅綫、練布、八角茴香、草藥諸藥，各遂其利，不困乏。今黃姓尚多，而儂姓絕少。智高亂後，儂氏善良許從國姓，今多姓趙氏。宜州徼外西原黃峒武陽羣小蠻，即唐黃家賊之地。崇建南丹使控制之。然莫氏家人亦有特相攻鬭者。其刺史莫延甚逐其弟延麋而自立。延麋奔朝廷，謂之出來者。凡州峒歸明延甚淫酷，不能服其類鄰。永樂固王民與爲仇，相攻。官反爲和解。延甚恃此益驕，不奉法。至私刻經略安撫司及宜州溪峒司印。效帥守花書行移，以嚇諸蕃落。邊將常恭懷姦利，與交通蠹害，爲代作奏章，冒至闕下。不關白經略司。范石湖作帥，捕勦以聞。削籍竄之。其後稍鑿。

獠俗

獠在右江溪峒之外，俗謂之山獠。依山林而居，無曾長版籍。蠻之荒忽無常者也。以射生食肉，而活蟲豸能蠕動者皆取食。無年甲姓名。一村中推有事力者曰郎火，餘但稱火歲首。以土杯十二貯水，隨辰位布

列郎火燒焉。經夕集衆往觀。若寅有水而卯涸。則知正月雨二月旱。自以不差。諸蕃歲賣馬於官道其境。必要取貨及鹽牛。否則梗馬路。官亦以鹽綵和謝之。舊傳其類。有飛頭蟹齒。鼻飲白衫。花面赤棍之屬。二十一種。今右江西南一帶甚多。殆百餘種也。唐房千里異物志。言獠婦生子卽出夫體。臥如乳婦。不謹其妻。則病乃無苦。

入寮

邕州諸溪峒。相爲婚姻。峒官多姓黃。悉同姓婚也。其婿嫁也。唯以麤豪痛擾爲尙。送定禮儀。多至千人。金銀幣帛固無。而酒醉爲多。然其費亦云甚矣。婿來就親。女家於所居五里之外。結草屋百餘間。與居。謂之入寮。婿家以鼓樂送婿入寮。女家亦以鼓樂送女往寮。女之婢妾百餘。婿之僕從至數百人。結婚之夕。男女家各督兵爲備。少有所爭。則兵刃交接。成婚之後。婿常袖刀而行。妻之婢少迕其意。卽手殺之。謂之逞英雄。入寮半年。而後歸夫家。夫自入寮以來。必殺婢數十。而後妻黨畏之。否則以爲懦。

挂劍

邕州溪峒之外。西南有蠻。其夫甚剛。其妻甚怯。夫婦異室。妻之所居。深藏不見人形。夫過其妻。必挂劍於門而後入。其合夫婦之道。夜期於深山。不以其所居也。云不如是。則鬼物有顯誅。

繡面

海南黎女。以繡面爲飾。蓋黎女多美。昔嘗爲外人所竊。黎女有節者。涅面以礪俗。至今慕而效之。其繡面

也，猶中州之笄也。女年及笄，置酒會親舊女伴，自施針筆，爲極細花卉飛蛾之形，絢之以福地淡葉紋，有
皙白而纏文翠青花紋曉了，工緻極佳者，唯其婢不繡。邕州溪峒使女，懼其逃亡，則黥其面，與黎女異矣。

鼻飲

邕州溪峒及欽州村落，俗多鼻飲。鼻飲之法，以瓢盛少水，置鹽及山薑汁數滴於水中，瓢則有竅，施小管如瓶嘴，插諸鼻中，導水升腦，循腦而下入喉。富者以銀爲之，次以錫，次陶器。次瓢飲時，必口嚥魚鮓一片，然後水安流入鼻，不與氣相激。既飲必噫氣，以爲涼腦快膈，莫若此也。止可飲水，謂飲酒者非也。謂以手掬水吸飲，亦非也。史稱越人相習以鼻飲，得非此乎。

飛驅

交趾俗上巳日男女聚會，各爲行列，以五色結爲球，歌而揜之，謂之飛驅。男女目成，則女受驅而男婚已定。

踏搖

猺人每歲十月旦，舉峒祭都貝大王於其廟前，會男女之無夫家者，男女各羣，連袂而舞，謂之踏搖。男女意相得，則男呼喚奮躍，入女羣中，負所愛而歸。於是夫婦定矣。各自配合，不由父母。其無配者，姑俟來年，女三年無夫負去，則父母或殺之，以爲世所棄也。

款塞

史有款塞之語，亦曰納款。讀者略之，蓋未覩其事爾。款者，誓也。今人謂中心之事爲款，獄事以情實爲款。蠻夷效順，以其中心，皆發其誓詞，故曰款也。乾道丁亥，靜江猺人犯邊，范石湖檄余白事帥府，與聞團結邊民之事。猺人計窮，出而歸命，乃詣帥府納款。其詞曰：某等既充山賊，今當鈐束男姪，男行把棒，女行把麻，任從出入，不得生事。若生事者，上有太陽，下有地宿。其翻背者，生男成鱉，生女成豬，舉家絕滅。不得不翻而說好，背面說惡，不得偷寒送暖。上山同路，下水同船。男兒帶刀，同一邊一點，一齊同殺盜賊。不用此款，竝依山例、山例者，殺之也。他語甚鄙，不可記憶，聊記其謂款者如此。

木契

猺人無文字，其要約，以木契合二板而刻之人執其一，守之甚信。若其投牒於州縣，亦用木契。余嘗攝靜江府靈川縣，有猺人私爭赴縣投木契，乃一片之板，長尺餘，左邊刻一大痕，及數十小痕於其下，又刻一大痕於其上，而於右邊刻一大痕，牽一線道合於右大痕，又於正面刻爲箭形，及以火燒爲痕，而鑽板爲十餘小竅，各穿以短稻穰，而對結繩焉。殊不曉所謂譯者曰：左下一大痕及數十小痕，指所論歸人將帶徒黨數十人以攻我也。左上一大痕，詞主也。右一大痕，縣官也。牽一線道者，詞主遂投縣官也。刻爲箭形，言譬人以箭射我也。火燒爲痕，乞官司火急施行也。板十餘竅而穿草結繩，欲讎人以牛十餘頭備償我也。結繩以喻牛角云。

打鬚

溪峒及岱欽還廉村落間不飲清酒以小甕乾醞爲濃糟而貯畱之每觴客先布席於地以糟甕置賓主間別設水一盃副之以杓開甕酌水入糟插一竹管管長二尺中有關捩狀如小魚以銀爲之賓主共管吸飲管中魚閉則酒不升故吸之太緩與太急皆足以閉魚酒不得而飲矣主飲魚閉取管埋之以授客客復吸飲再埋管以授主飲將竭再酌水攪糟更飲至甚醉而止其爲毒也不別設酒主人妻子同毒客其妻先酌水入甕致詞以管授客飲已男若女迭酌水爲壽客之多飲毒酒也實多飲水耳名曰打甕南人謂甕爲甏

抵鵠

自安南及占城真臘皆有肩輿以布爲之制如布囊以一長竿舉之上施長篷以木葉鱗次飾之如中州轎頂也二人舉一長竿又二人策行安南名曰抵鵠安南使者黃榮以一抵鵠載一妾自隨凡使者至欽皆有涼轎釘銹黑漆甚澤而兩竿盡短雨晴皆用之此蓋效中國爲之也若其本國只用抵鵠爾

十妻

南方盛熱不宜男子特宜婦人蓋陽與陽俱則相害陽與陰相求而相養也余觀深廣之女何其多且盛也男子身形卑小顏色黯淡婦人則黑理充肥少疾多力城郭虛市負販逐利率婦人也而欽之小民皆一夫而數妻妻各自負販逐市以贍一夫徒得有夫之名則人不謂之無所歸耳爲之夫者終日抱子而遊無子則砧手安居羣婦各結茅散處任夫往來曾不之較至于溪峒之首例有十妻生子莫辨嫡庶至

於讎殺云。

捲伴

深廣俗多女嫁娶多不以禮。商人之至南州，竊誘北歸，謂之捲伴。其土人亦是捲伴，不能如商人之徑去。則其事乃有異始也。既有桑中之約，即暗置禮聘書於父母牀中，乃相與宵遁。父母乍失女，必知有書也。索之祇席間，果得之，乃聲言證之，而迄不發也。歲月之後，女既生子，乃與婿歸禮歸寧，預知父母初必不納。先以醕酒入門，父母佯怒擊碎之，婿因請託鄰里祈憇。父母始需索聘財，而後講翁婿之禮。凡此皆大姓之家然也。若乃小民有女，惟恐人不誘去耳，往誘而不去，其父母必勒女歸家，且其俗如此，不以為異也。

鬪白馬

廣人妻之父母死，壻至祭，必乘馬而往，以二牌棒手前導，將至妻家，駐馬以待。妻家亦以二牌棒手對敵，謂之鬪白馬。婿勝則祭得入，不勝則不得入，故婿家必勝以入其祭。

迎茅娘

欽廉子未娶而死，則東茅爲婦於郊，備鼓樂迎歸而以合葬，謂之迎茅娘。昔魏武愛子蒼舒卒，聘甄氏亡女合葬。明帝愛女淑卒，娶甄氏亡孫合葬。欽之迎茅娘，夷風也。曹氏父子，直爲冥婚，豈足尚。

志異門

天神

廣右敬事雷神謂之天神其祭曰祭天蓋雷州有雷廟威靈甚盛一路之民敬畏之欽人尤畏圃中一木楷死野外片地草木萎死悉曰天神降也許祭天以禳之苟雷震其地則又甚也其祭之也六畜必具多至百姓祭之必三年初年薄祭中年稍豐末年盛祭每祭則養牲三年而後克盛祭其祭也極謹雖同里巷亦有懼心一或不祭而家偶有疾病官事則鄰里親戚衆尤之以爲天神實爲之災

聖佛

南海諸蕃國皆敬聖佛相傳聖佛出世在真臘國之占里婆城聖佛女子也有夫渡海而舟爲龍王所薦乃謂龍王曰使我登岸當歲生一子以奉龍王旣海神送其舟於占里婆城乃顯神異人有慢輕必降禍也人有斬求必赴感焉人有自欺於前必報驗焉南蕃皆敬事之凡相爭者必相要質於聖佛前曲者不敢往也南蕃所居皆茅廬唯聖佛廟貌甚整黃金飾像四軀爲四殿蓋一佛而三夫也女巫數輩謂之夷婆廟多鼓舞血食無虛日每歲正月十三日設席於廟前積禾於中請聖像出廟而焚禾以祭十四日聖佛歸廟二十日聖佛生子乃忽有一圓石出其身二十日夜舉國人民不寐以聽佛之生子明日國人皆奉珍寶屏象獻佛其所生子舟載而投諸海以奉龍王云六合之外妖祥怪誕愈多如此

常諫議

欽州常諫議廟去城數十里太守到任謁之雨暘不時禱之輒應六朝時有雷猛力據有其地隋朝因拜

猛力爲安州刺史，然恃險驕倨自若也。自令孤熙爲桂州總管，諭以恩信，乃詣府請謁。後熙奏改安州爲欽州，猛力欲隨使者何惆入朝而死。其子長真葬畢即入朝，乃以長真嗣爲欽州刺史。唐高祖授長真欽州都督，長真死，子據襲刺史。然則諫議其猛力歟？猛力最有功於欽，欽人即其墓宅社而稷之，置祭田數頃，諸常掌之。至今尚存，諸常今爲大姓。每科舉嘗有薦名者，欽之祀無非涇祠，惟諫議爲正。

武婆婆

廣右人言武后母，本欽州人，今皆祀武后也。冠輶巍然，衆人環坐，所在神祠，無不以武爲尊。巫者招神稱曰：「武太后娘娘。」俗曰「武婆婆」也。

轉智大王

欽州陳承制，名永泰。熙寧八年，交趾破欽，死於兵。先是交人謂欽人曰：「吾國且襲取爾州，以告永泰，弗信。」交舟入境，甚急。永泰方張飲，又報抵城，復弗顧。交兵入城，遂擒承制以下官屬於行衙，曰：「不殺汝徒，取金帛爾。」既大掠，則盡殺之。欽人塑其像於城隍廟祀之，號曰「轉智大王」。凡嘲人不懼，必曰「陳承制云」。

新聖

廣西凌鐵爲變，鄧運使擒之，蓋殺降也。未幾，鄧卒，若有所覩。廣西羣巫乃相造妖，且明言曰：「有二新聖，曰鄧速使，凌太保，必速祭不然，癘疫起矣。」里巷大譖，結竹粘紙爲幡，馬旗械器，祭之於郊，家出一雞。既祭，人憚而散，巫獨齋數百難以歸。因歲歲祠之。巫定例云：與祭者不得罪。胙故巫歲有大獲，在欽爲尤甚。

雞卜

南人以雞卜。其法以小雉雞未攀尾者，執其兩足，焚香燭所占而撲殺之，取腿骨洗淨，以麻線束兩骨之中，以竹梃插所束之處，俾兩腿骨相背於竹梃之端，執梃再燭，左骨爲儂儂者我也，右骨爲人人者所占之事也。乃視兩骨之側，所有細竅，以細竹梃長寸餘者，偏插之，或斜、或直、或正、或偏，各隨其斜直正偏而定吉凶。其法有一十八變。大抵直而正，或附骨者多吉，曲而斜，或遠骨者多凶。亦有用雞卵卜者，焚香燭祝，書墨於卵，記其四維而煮之熟，乃橫截，視當墨之處，辨其白之厚薄，而定儂人吉凶焉。昔漢武奉越祠雞卜，其法無傳，今始記之。

茅卜

南人茅卜法。卜人信手摘茅，取占者左手，自肘量至中指尖而斷之，以授占者，使燭所求，即中擗之。祝曰：奉請茅將軍，茅小娘，上知天綱，下知地理，云云，達禱所卜之事。日且燭，手且掐，自茅之中掐至尾，又自茅中掐至首，乃各以四數之。餘一爲料，餘二爲傷，餘三爲疾，餘四爲厚料者，雀也。謂如占行人早占遇料，行人當在路。此時雀已出巢故也。日中占遇料，則行人當晚至。時雀至暮當歸爾。晚占遇料，則雀已入巢不歸矣。傷者聲也，謂之笑而貓。其卦甚吉，百事歡欣和合。疾者，黑面貓也。其卦不吉，所在不和，厚者滯也。凡事遲滯，茅首餘二名曰料，貰傷，首餘三名曰料，貰疾，餘皆倣此。南人卜此最驗。精者能以時辰與茅折之委曲，分別五行而詳說之。大抵不越上四餘，而四餘之中各有吉凶，又係乎所占之事。當卜之時，或遇

人來則必別卜。曰外人踏斷卦矣。余以爲此法卽易卦之世應擇蓍也。嘗聞楚人筮卜今見之。

南法

祝融之墟威靈所萃其間異法亦天地造化之流也。巫以荆得名豈無自然而然哉。嘗聞巫覡以禹步咒訣鞭笞鬼神破廟垣竈余嘗察之南方則果有源流蓋南方之生物也。自然稟禁忘之性在物自然況於人乎。邕州溪峒有禽曰靈鵠善禹步以去空塞又有鳩鳥亦善禹步以破山石。有蠻曰十二時能含毒射人影以致病以是觀之南人之有法氣類實然。然今巫者畫符必爲鳩頂之形亦可見其源流矣。是故愈西南愈多詭異茫茫天地法各有本必有精于法者亦云自然而然非人所能爲也。

家鬼

家鬼者言祖考也。欽人最畏之。村家入門之右必爲小巷升當小巷右壁穴隙方二三寸名曰鬼路。言祖考自此出入也。人入其門必戒以不宜立鬼路之側恐妨家鬼出入歲時祀祖先卽於鬼路之側陳設酒肉命巫致祭子孫令樂以侑之。窮三日夜乃已。城中居民於廳事上置香火別自堂屋開小門以通街新婦升廳一拜家鬼之後竟不敢至廳云儒至則家鬼必繫殺之。惟其主婦無夫者乃得至廳。

挑生

廣西挑生殺人以魚肉延客對之行厭勝法。魚肉能反生於人腹中而人以死相傳謂人死陰役於其家。有一名士嘗爲雷州推官親勘一挑生公事置肉盤下俾因作法以驗其術。有頃發視肉果生毛何物淫

鬼乃能附也。然解之亦甚易。但覺有物在胸膈，則急服升麻以吐之。覺在腹中，急服鬱金以下之。此方亦雷州鏹板印散者，蓋得之於囚也。

蠶毒

廣西蠶毒有二種。有急殺人者，有慢殺人者。急者，頃刻死。慢者，半年死。人有不快於己者，則陽敬而陰圖之。毒發在半年之後，賊不可得。藥不可解。蠶莫慘焉。乾道庚辰，欽州城東有賣漿者，苦蠶毒，敗而伏辜。云其家造毒，婦人倮形披髮，夜祭作糜粥一盤，蝗蟲蠍蝶百蟲，自屋上來食，遺矢乃藥也。欲知蠶毒之家，入其門上下無纖埃者，是矣。今黎峒深峒人，置酒延客，主必先嘗者，示客以不疑也。

罔兩

淳熙乙未正月朔，罔兩見於融州融水縣治。有人之影，無人之形。倮而披髮者無萬數。有一手力持紙錢，焚之，影就赴火，又復散亂。有頃乃沒。是日城外有神廟，煙火自地出，經日而滅。一郡大驚。鄰阻夢爲融教官日見而言之。是年融不聞有異。

柳州螺螄

柳州種甘棠，頃年，夜有光出柱上蠶穴中，滿堂如月。別視，見鱗甲大如鏡。太守知異物，集吏卒持斧鋸齊刺之，有聲若然。破柱乃大螺螄，長竟柱，腦中得珠如鷺卵，圓走盤，光遂不見。

桂林猴妖

靜江府盤溪巖下，昔日有猴壽數百年，有神力變化，不可得制。多竊美婦人，歐陽都護之妻，亦與焉。歐陽設方略殺之，取其皮以歸。餘婦人悉爲尼。猴骨葬洞中，猶能爲妖。向城北民居，每人至必飛石，惟姓歐陽人來則寂然，是知爲猴也。張安國改爲仰山廟，相傳洞內猴骨宛然，人或見眼忽微動，遂驚去矣。